


WOOHIKHALA MUSURUKHU

WALA WOOHIKHALA EHisapo

 Vekeekhai oreeriwa otthikela otapernakulu, voosis'ula. Miyo kinnikoha paahi... Munna Neville ohimnye wira anci-ene khayaawerya wiiwa ottuli. Munniwerya okiiwa saana vano, ottuli iwo? Yoolikana? Vaareera. Miyo ka—miyo ka mukhaani, tivo kihaana onyakula vanci-ene wira atthu asuwele wira kiri vaava.

² Vano, kinnuupuwela okathi mmosa okathi waavar'aka muteko Miteko sa Mmuttettheni. Kaawelaka exikatta... Ni kaawaraka ixapattho suulupale, saarina misomari, okathi weettaaka muliinyani wa ivoltaaxe suulupale. Nto kaaniwela ixikatta. Nto muhano Ehalt, yoowo okhanle mpatthani aka, aari opaineeli sentraale. Kookupali wira Mwenye Ginther vale aammusuwela, orattaane. Vano Edith khwira, “Billy, munkhala onyakulaxa, wira mukhale mutthu mwaamukhaani, kitonko aka omoona.” Munyakelaka misomari iyo mikhaani, nwelaka ixikatta.

³ Miyo khwira, “Ahe, Edith, nkireere oyeva, kihaana waasuweliha atthu othene wira kiri wenna, onyakula vanci-ene.”

⁴ Ahe, miyo kirookela paahi wira kiihane. Munna Neville aahikileela wira mpatthani ahu ooreera murima, Munna Roy Roberson, khokhanle vamutekoni w'okokhorela voosis'ula, mwaha w'owereiwa. Yawawe... Owo aarina niino nookhomakeliwa. Nlo khimuruuhela oropa, ni khimutannya ehooma. Nto owo ohaana okumihiwa nenlo, kinoona wira, naanaanoru. Ni Roy onikhalaka ntoko tiithi wa hiyo va, ni hiyo ninnimpenta. Nto miyo khwira, “Munna Roy, miyo—miyo kinookela naanaano, minuutu vakhani paahi, mmutekoni wo okokhorela.” Miyo khwira, “Kinrowa ovekela ekereja wira hiyo othene noovekeleleni, voosis'ula,” ni meelo owo aarowaka, wira yiiriwe yeeyo. Niino nlo ninnunwe nookhoromana, wala etthu, naakhomakeliwe voovonyeya, ni nihaana othikiliwa, ni okumihiwa.

⁵ Munna Roy mutokweene, ntoko nyuwo othene sinsuwelaanyu, a Ekhotto Ya Neili ya Mulaponi mothene, owo ohoopeliwa kapatti-kapatti. Ni wahaari oreera murima wa Muluku, owo khaarowa wira okhanle-ene. Owo aahimmaathi eriyari y'alipa-ookhwa, okathi munci-ene; miyoono sihameenle-ene va, ni metto sihameenle-ene, ni mitika suulupale sikhwiye. Nto tothoro khwira, “Owo aakhanleru mukumi, khaarowa

weetta nivalo nimosa.” Ni mahala a Muluku, owo onvara muteko khula nihiku, owelaka n’itthu sothene. Muluku onnikhalaka oomureerela murima okhala wira owo mutthu ooreera murima, ni hiyo ninnimphenta. Ni hiyo, hiyo na—hiyo khanihiyo othene. . .

⁶ Hata nikhalaka oratta-ene, eyo khenihimya wira hiyo khanimphwanya mixankiho. Voohithepya, enihimya wira mikattyamiho sothene sinithoonyiheriwa wa hiyo. “Tthiri sinimuriipiha murima naxariya ti soowaatta, masi Muluku onnimwaakiha sothene.” Eyo ti epantte ya ntittimiho.

⁷ Vano ninrowa ovekela nivekelo nimosa paahi n’omeekha voosiis’ula, wa Munna Roy. Kaatthuna kisuwele sinto ookhala mutthu mu, nave, aatthuna ovekeleliwa, aatthuna wuupuweliwa ni nuulomo na mavekelo? Yavenxa-ru matata paahi. Vaareera. Ti yooreera. Nrowe nivenye okathi vakhani paahi, xontte, okathi onvekelaahu.

⁸ Pwiya, hiyo nnoorwa olelo, wopaceryani wa esabbath. Ni nsuwa nnoothara eyeettelo aya vano, wira nivave molumwenkuni, niruuhele muthuko ni ekumi itthu iye sirumeeliwe aya wira siirihe siiso. Ni wopaceryani wa muteko, hiyo niryeene epantte ya Ekereja Anyu, yitthaniwe wira ekhaliheke miteko sa ovoniha, ovonihiwa wa erutthu, wira emaliherye soophavela ni soothuna sa Pwiya’ahu oottottopeliwa Yoowo ohaaxeriwe sootheka sahu, ni makhwatta Awe t’anivoninhe, ni ninvekela, wopaceryani wa muteko, okathi onipaceryaaya wiinuwa, mwa masipo, ni mirima sahu sinipaceryaaya ovenya, wira hiyo nimuupuwele, voosiisu ula, Pwiya, munn’ihu, oophentiwa, Roy Roberson, murumeyi Anyu oowiiyeviha. Ni hiyo noosuwela wira Nyuwo muhiinanela ekumi awe vapuwani v’ekhotto, ni Nyuwo munnikhalaka oomureerela murima yoowo. Nto olelo owo onihaaxeya ni muxankiho, vahiwenryaawe okhala okereja.

⁹ Nto, Pwiya, okathi awo yaavekelaaya mpaani mwa Yohani Marku, naahikhala Nlaikha naakhuruwenle mukalapooso, mwemmo Petru aaryaawe ootthukeliwa, khuhula mikhora, vootikiniha-vo, khumukumiha.

¹⁰ O Pwiya, Nyuwo nlelo mwa Muluku. Malaikha awo ari mwa vooruma Wanyu voosiis’ula. Hiyo ninnivekela, Pwiya, wira okathi onvekelaahu mu mpaani mwa Muluku, Malaikha erowe owannyawe Munna Roberson. Otthuna wawe okhala vooপুরoni vawe va, masi muxankiho woomukhoottiherya. Ni wira Malaikha a Muluku envuluxe, emukhalihe mukumi, wira owo awerye okuxa-tho opuro awe mpaani mwa Muluku.

¹¹ Aakhala akina anvira mukattyamiho, awo—awo anoowereiwa. Ni noomoonna muthiyana mutokweene, okathi aairaawe wira okilaathi, khuvenxa matata, okathi waaveveleyaawe. Owo ohoorwa mpaani mwa Muluku, wira

avonihiwe. Munivahe, Pwiya, wira owo akhume eettaka, ni ohakalala ni emiravo ya omwali.

¹² Othene akina aavenxale matata, manci-ene aya aavenxiwa, okhala wira yoolepmpwa, ni yoohimmwa khalayi-ene, “Tthiri sinimuriipiha murima naxariya ti soowaatta, masi Muluku onnimwaakiha sothene.” Wira olelo nivavele mowaaminini, miyoono sa waamini, onrowa onivuluxa iretta sothene ni muxankiho. Muteko wamala vale, ohikhale hata mutthu ootteetheya eriyari ahu.

¹³ Munivahe, Pwiya, wira khula mulipa-ooaamini akhale mulipa-oowaamini. Ni okathi onthokelelaahu Masu Anyu, Erooho Yoowaarya ekuxe Yaawo ehele mmurimani mwahu, ni vaavo enaanihe Yaawo mpakha Awo okhala muhokorokho wa Masu. Muniirele yeela, Pwiya, nuuramihaka muru ahu vowiiyeviha ni ovekela mwa Nsina na Yesu. Amen.

Mukilaathiki.

¹⁴ Nihinatthi okela mmutthakani wa muteko w’okokhorela wa voosiisu ula, kaatthuna musuwele, eri vakhiviru. Akhala a nyuwo orina wiitthyuwa, ni aatthuna okhala mwa mmosa wa miteko s’okokhorela sinrowa okhalihwiwa oMiddletown, Ohio, opacerya Sekunta, esumana emosa, enrowa okhala mmapuwani wa maxaaxa.

¹⁵ Moosuwela nsina nene na nipuwa na maxaaxa, Gene? [Munna Gene oniira, “Ehimmye wira yaari ikilomo muloko ni thanu na xexe wa oMiddletown.”—Mol.] Munna Sullivan. Middletown epooma yaamukhaani, woona waka ntoko Jeffersonville nno. Nlo nipuro na paasiketi. Munna Sullivan ti pastore weiwo. Khula emosa wa ikereja sa Ehapari yooreera Yoomalela, weiwo sikhahle miloko mithanu na mosa n’itthu sikhaliheryaka vamuthukumanoni yoola, sinoowerya wooleelani vari nipuwa na maxaaxa.

¹⁶ Ni anookhala marapattha manci-ene omaxaaxani, kileeliwe siiso, wira ewaakheleke athu antthuna orwa. Vano mithukumano simpacerya Sekunta mpakha Saapatu, mahiku mathanu na mosa. Ni khenrowa okhala Ettiminku, mwaha wa ikereja sikina, wira ewerye orowa okhalana miteko s’okokhorela saya sa khula nihiku. Khino, sinookhala miteko so ovoniha, wala waavekelela aretta, khula ohiyu. Ni athu othene annilattuliwa. Nto eyo enrowa opacerya mahiku yeettaka 10, mpakha 15, Sekunta mpakha Saapatu. Nto nyuwo mwakhalana wiitthyuuwa, ni—ni mwakhalana wiitthyuuwa wanyu onkhuveela, ni munatthuna oviriha siiso, ahe, hiyo vekeekhai naamutteeliwa murima okhala ni nyuwo.

¹⁷ Nave-tho kaatthuna kaalipiherye othene ale ahipatishiwe mwa opatiiso wa oKristu, wira ehale voosiisu ula ni ethhokelele. Ni mukhale oolikana wa muteko w’opatiiso yoowo onrowa

ottharelana muhina mwa minuutu soophiyaka miloko mixexe ni mithanu vano, woona waka. Eyo enrowa okhala vaava mukereja.

¹⁸ Vanninisivela vanci-ene waalipiherya wira atthu epatisiwe mwa opatiiso w'oKristu, nisuwelaka wira ti wootthuneyaxa wa woopowa. Maana yoolempwa ni Pwiya'ahu, oruma Wawe wookiserya, oruma Wawe wookiserya Ekereja. Wala, ntoko Owo sirumme awe Ekereja, vookiserya, Owo iirale, "Murowe mulaponi mothene, mwalaleerye Ehapari yooreera soopattuxiwa sothene. Ole onrowa waamini khupatisiwa onimoopowa." Vano hiyo noosuwela wira ti yootthuneyaxa wira hiyo nipatisiwe nipwinihiwaka.

¹⁹ Ni ninootthapela woovarelandi muteko yoola nyuwo, wa khula mutthu okupanli mmurimani mwaya wira Yesu Kristu ti Mwaana a Muluku, wira Owo okhwiye wira owoopole anatampi, ni nyuwo mwaari mmosa Owo omukhwenlyaaawe wira omoopole; ni mwaathuna orwa khupatisiwa ni Nsina na Yesu Kristu wira muleveleliwe itampi sanyu; muhimeeryaka, olumwenku, wira nyuwo munnamini wira itampi sanyu soleveliwa, ni wira vano munrowa okhala mwixutti a Pwiya Yesu, wira mukhale opuro anyu.

²⁰ Mwaahikhalane hata ekereja yo orowa-wo, naamutteeliwa murima okhala ni nyuwo mpatthanaka ni hiyo. Hiyo kharina mamempuru va. Ela etapernakulu yootthukuwa, wa Erutthu yothene ya Kristu, ya khula muromolelo. Hiyo nnikhala ntoko oohikhala a miromolelo. Vano hiyo ninnaahulela mikhora atthu othene, voohicala wira awo t'ani, nikhuli, nloko, wala eyaaminelo, atthu othene t'orwa saana. "Ole onthuna, arwe." Ni mwaahikhalane ekereja ekina, naamutteeliwa murima nyuwo orwa ni opatthana ni hiyo. Khekhanle hat'etthu yo wiitakanihana. Nvolowe paahi okathi mikhora sinhuliwaaya, mpatthane ni hiyo. Ti yeeyo tu entthuneya; orwa siiso paahi. Murwe ni murima wootthukuwa, muhele makhata anyu vantthekoni, ni munikhaliherye okathi onkelelaahu ohoolo mwaha wa Omwene wa Muluku. Maana, vakhala wira ninnaamini wira okathi, ori vakhiviru mmatatani, okathi ithu sothene saalavuliwe mBibiliani simmaliheriwaaya.

²¹ Vekeekhai anci-ene a nyuwo moosoma moolumo a Khrushchev, nuulumo nawe wa N.U., nihiku nle, kaahimeeriwaaka epaphelo ya ihapari ya oCanada, ni mpatthani mmosa. Owo iirale, "Vakhala wira ookhala Muluku, Owo oolikana wira ovele ni okumihe-tho empa m'olompa, ni nyuwo makapitalista, ntoko Owo siiralyaawe wopaceryani." Tivo vano munoowerya osoma muhina mwa iliinya, "Owo oolikana wira ovele-tho empa m'olompa." Ni ti yoonanarexa, komunista ohimyaka etthu ntoko yeeyo? Owo aahikhalana etthu, nawe. Ti yeeyo. Ti akapitalista, wopaceryani, atannyale mulattu uwo. Hiyo na akapitalista.

²² Koomwiiwa pastore ahu, ootthuniwa ni oophenteiwa, Munna Neville, ohimya nuulumo mutelevisawuni mwawe... elaleyeryo ya muraatiyuni, voosiisu uwo, yeeyo yaatthikenle erumaka, mmuupuweloni mwaka. Miyo nkinwerya oliyala tu. Kaahimuleela mpatthani aka mmosa, nsana ohiyu. Ni yaari ila, wira enimwiiraneya... Nuumala okumihwiwa Erooho Yoowaarya, elapo ya vathi, wira etiini yookhaleleya ya ekereja nootthikela ekelelaka ohoolo, ehisuwelaka evirikanelo. Nyuwo mootoko, moo... Akavi yiiwale yeeyo? Eyo khiyaari yootutuxa? Awo khansuwela Erooho Yoowaarya, tivo khanrowa osuwela okathi Eyo eniiraaya eronwe, ni awo anrowa okelelaka ohoolo ntoko kweekwe. Okathi ole ookiserya onttthitiwaawe ekanyeryo mw'Erutthuni ya Kristu, awo nlelo anrowa okelelaka ohoolo, yiilipihaka wira yaaruuhe alipa-oorukunxa murima wa Yeeyo, okhala wira khansuwela exeeni Iyo. Nto itiini saya sookhaleleya sinrowa otthikelaka ntoko saaryaaya. Vano, siiso khino nihoobelakani ntoko miyo, masi nlo vekeekhai naari nuulumo nootutuxa. Wira, awo anrowa okhala ottaiwenexa, mwa iyiirelo sa etiini paahi, mpakha ehinrowaaya waahaleela Erooho Yoowaarya, okhala wira khansuwela exeeni Iyo, opacerya wene.

²³ Muluku animorele ikharari. Munna, kaanittthuna kikhale mwa makhalelo ala, ni otthuna waka, mpakha hata ehaawelo Awe yooyevaxa, miyo kisuwele eyo mmurimani mwaka. Kairaru etthu yaarowa omuriipiha murima Owo, miyo kiwerye woona owereya okathi ene yoowo.

²⁴ Vaatepaxa, ohikhala Wawe; nkinthuna okhala mu Owo aahikhale muumu. Kintthuna kiire kironweene nto, ayo, mulopwana, maana khenrowa okhala hata Ephome vamukhuneeloni. Onrowa okhala wooriipela ni voosareya mwiixi ni vooriipa. Empa khenrowa okhalana Mulapeli vale, wira aakihe mwaha ahu okathi uwo. Moosuwela wira Yoolempwa enihimya yeeyo? Empa yaatthuwa mwiixi. Khiyaakhanle hata Ephome vamukhuneeloni, vano olamuliwa.

²⁵ Apwiya, mwa okathi uwo woopaceryani wa ephovo ela, yanivaha-ru muhakalaliho ohiyu vakhani, kinoomalaru ohimya, kintthuna kikuxe Eliivuru ile ya Wiisuupulula, wira nisome yeeyo, orowa olukama Eliivuru yeeyo ya Wiisuupulula, vo.

²⁶ Vano, olelo, koosuwela wira aakhala anci-ene anrwa, wira evekeleliwe. Ni oskritooriyuni waka waahiwaliwa olelo, wala esumana ela. Ni amosa-amosa wa atthu yaarwiiye, khiyaakhalanne okathi wo ovekeleliwa, iwe, okhala wira amiravo yaahirowasa, mwa nihiku nimosi wala ovikana, omumula. Awo aakhalanasa muteko munci-ene wo ovara; muteko aya yaawo, ni muteko wa otapernakulu, wiilhana wa telefooni aka ni itthu sothene. Eyo naanaanoru enniwuukhulani. Ni vano nto mwaha wa yeeyo. Miyo koosuwela wira kihaana okhumela nipuro nlo, imaara kamosa-kamosa, ni wira etthu yoovirikana, ni miyo koosuwela wira ni awo, nave. Vano, awo

khukiihana. Miyo khwira, “Kinoona wira yaamukhala saana.” Ni ninoorowa waavekelela aretta, okathi vakhani.

²⁷ Ni kihuupuwela wira nisome vakhani Masu a Muluku. Mwakhalana Bibilia anyu vano, nrowe nikhunle muLiivuruni mwa Yesaya. Okisivela owoonani okuxa Eliivuru anyu ni osoma Yeeyo. Kinisoma...Nyuwo mwaahisome ovikana Nuulumo nimosa wala maili, nlelo, Awo Masu a Muluku, Ahinimala ni Ahinikhwa. Khivanweryaneya awo ovira. Kapiitulu 5 ya Yesaya, mwaha, “Woopowa ohinimala.”

Nyuwo, othene nvoliwe ntthona, murwe vamaasini, ni ole ohikhalanne musurukhu; murwe, muthume, mulye; ayo, murwe, muthume eviinyu...eleethi woohikhala musurukhu ni woohikhala ehisapo.

Munihononela-ni musurukhu ni itthu sihikhanle yoolya? ni muteko anyu ni itthu sihinvonniwa? mukiwiriyane vanci-ene, mulyeeke yoolya yooreera, munepa anyu opuheke itthu soonuna.

Muuramihe niyaru nanyu, murwe wa miyo: mwiive, nto munep'anyu onookhala mukumi; ni kinoopaka mwaataano ohinimala ni nyuwo, hata vekeekhai omoriwa ikharari voolipihereya wa Davidi.

²⁸ Kaatthuna olavula ni nyuwo, okathi vakhani paahi, mwaha wa: *Woohikhala Musurukhu Wala Woohikhala Ehisapo.*

²⁹ Sookhala itthu sinci-ene so orukuneiha sa mahiku ahu. Sookhala sinci-ene wira saakuxeke murima atthu wa ele naarowaahu wiihana “soopuha,” ni ti y’atthu othene, miyunuwelo sothene.

³⁰ Sookhala soowaakuxa murima amwaavano, soowiina sa vano ni meera a rock-and-roll, ni muusika awo arin’aya yoowo onrowa ni yeeyo. Ni yothene eyo ti yookuxa murima, wira erukuneiheke.

³¹ Nkincala oreera xeeni nipuro mwaana oleliwaawe-vo, ni moota oxutthiwaawe wira yooreera; mwaan’owo aahikupaliru musuwelelo wa Oyariwa vasya, muusika wa rock-and-roll onoonvara murima omalakarw wiiwa. Okhala wira, mwa yoowo, eniyariwa mwa yoowo, mwa ephattu, erooho ya erutthu. Ni owerya wa xetwani ti wuulupalexa, olelo, mpakha onvaraaya erooho eyo ya mwaamukhaani uwo.

³² Ni vootepa-tho enrowaaya omwiiriha mulweene, nto, okhooitale Oyariwa vasya! Okhala wira, voohikhala wira makhalelo anyu anoorukunxiwa, ni nyuwo khurukunxiwa murima ni khuyariwa vasya, Momweneni mwa Muluku, mukhalelo anyu nlelo onrowa okhala wa itthu sa molumwenkuni, hata wira moota xeeni munkhalaanyu natiini, voohikhala wira eyo eroorukunxiwa mwa nyuwo. Mwaamuwerya okokhorela ni okhala natiini, masi nlelo

enookhalana enamuna emosa ya owerya wo okuxa murima wa nyuwo, okhala wira mutth'ula a khalayi a etampi ni sootthuna sawe nlelo khokhwiye mwa nyuwo.

³³ Masi vammalaanyu omuhiya Kristu okuxa ehice mmurimani mwanyu, itthu iyo khasinihaaxa. Ti yuulupalexaxa.

³⁴ Miyo nkinwerya ohimya nsina na mulopwan'owo, okhala wira nkinwerya wuupuwela nsina nawe naanaano va, masi anci-ene a nyuwo munoomuupuwela. Enihimmwa wira yaahikhala esisiro weiwo alopwana yaarowaaya, moowiiipithela, nto athiyana yaamukhuma, yiipaka. Ni masipo aya yaari ooweererya, mpakha anahota eviraka, mpaketini, yaakelaaya mme. Vano nto atoropa yaaipinthe yaana—yaanaavara anahota ala ahiikasoopale, ni owiivasa. Nto mulopwana mmosa muulupale aatthuna ovira. Ni owo khuwiirela anahota awe wira emutthukwele vanlikotthini, ni—ni—ni ehele etthu mwaano mwawe, wira ohikhuwele; ni—ni khuhela ittiyelo owaruni wa anahota awe, wira ahiweryeke wiiwa, ni yaavira vale, wira ehiiwe. Vano athiyana yaahikhuma, yiinasaka ni—ni ekhuwelasaka, ni yiipasaka, ni, oh, yaari yuulupalexaxa, mpakha owo oxetta esapala munresani mwawe, aakhuwelelaka anahota awe, “Mukele mmwe! Mukele mmwe!” Masi awo khiyaawerya omwiiwa, awo yaarina ittiyelo mmaaruni mwaya.

³⁵ Vano nto owo aahimweettiha paketi mpakha nipuro nimosa vaavo yaarinaaya otaphula nlikotthi awe, ahiiso, otaphula matata awe, ni owo aahaana okumiha ittiyelo mmaaruni mwaya. Vale, eettaka mphironi, owo aahimwiiwa mulipa-oowiiipa muusika mmosa aari muulupalexaxa ovikana ole ohitto iwe, wira okathi owo ovinryaawe-tho otthikaka iwe, awo yiirole, “Oh, namatuphela muulupale, nootthukelelekeni-tho vanlikotthini?”

³⁶ Owo khwira, “Nnari, mukihiye ootaphuwa. Kihiiwa etthu yuulupalexaxa, mpakha eyo ehinrowaaya okihaaxa-tho.”

³⁷ Ti siiso eryaaya wa muKristu ooyariwa vasya. Awo yaaroophwanya etthu yuulupalexaxa onvikana rock-and-roll ni irukuneyelo sa olumwenku ula. Awo ansivelihiwa ni Erooho Yoowaarya. Eyo yuulupalexaxa, mpakha olumwenku oryaaya wookhwa wa awo.

³⁸ Masi mwaarowaka woorukuneyani nno woohifayi, muhaana wuupuwela wira muhaana okuxa musurukhu munci-ene. Mmiravo mmosa onimuroiha mposi awe mmeerani ala ni moowiinani iya, ni sikina, onoorowa ohonona epantte yinci-ene ya soophwanya sawe sa esumana. Ni atthu aalweene amphavela ophwanya opuha mwaha wo orowa musaala mwa saravexa, wira yakumihe mixankiho saya sa esumana ewuryaka, ahaana orowa ohonona musurukhu munci-ene. Nto awo amphwanya-ni ni yeeyo? Awo khamphwanya etthu woohikhala oriiipiwa murima.

³⁹ Ni muupuwele, muhaana olakiherya eyo ni Muluku nihiku nlo. “Ni nlevelo na etampi okhwa.” Nyuwo khamumphwanya etthu mu mulaponi, ni yeeyo. Eyo ekeri-keri yoowootha. Owurya onrowa waacererya muxankiho paahi. Etampi enrowa waacererya okhwa paahi vasulu va okhwa. Exeeke anyu yookiserya enrowa okhala ovalaanihiwa ni Muluku, Voochimala; orowa Vantthiyani va Mooro. Ni khimukhanle ophwanyaka etthu, opweteiwa paahi.

⁴⁰ Vano Muluku onimoorwa ni okoha, “Munihononela-ni musurukhu anyu ni itthu iya sihintteeliha murima? Muniirelani yeeyo?”

⁴¹ Exeeni enimwiiriha mutthu otthuna wira yeeyo? Awo anoothonona sothene arinaaya, sothene anweryaaya ophwanya, wira ethume soowurya, wira enwarithe muthiyana aneettanaaya, wala enamuna emosa ya soopuha, sa molumwenkuni ni sa ithaama.

⁴² Masi hiyo ninnihimeeriwa mBibiliani, ni ninnilattuliwa orwa wa Muluku, “Ni othuma ohakalala Ohinimala ni Ekumi Ehinimala, woohikhala musurukhu wala woohikhala ehisapo.”

⁴³ Itthu iyo khasinwerya otteeliha murima, ni emalelo aya ti okhwa Ohinimala. Ni enookuxani musurukhu wothene mukhanlyaanyu othukumanyaka, wira mukhale mu—mutthu oolemeliheya wala namarukuneiha, wala mmiravo oorukuneya, wala etthu p’itthu mukhanlyaanyu okhalaka, wala mwali oosuweliwa, wala etthu p’itthu. Enookuxani sothene mukhanlyaanyu othukumanyaka, wira mwiire yeeyo. Owara ikuwo sooreeraxa, ni—ni wira itthu olumwenku oniiraaya, wira paahi muhepe exeeke ya ehukumu Ehinimala.

⁴⁴ Muluku oohimya, nto, “Mwaha wa xeeni?” Ninrowa wira exeeni Nihiku n’Olamuliwa, okathi onikohiwaahu, niirenleni yeeyo? Exeeni enrowa okhala waakhula wahu? Exeeni enrowa okhala waakhula wa Amerika a vano, onihimya wira awo elapo ya oKristu? Ni onnihononaxiwa musurukhu mwaha wa wiskhi, mwaakha mmosa, ovikana wa yoolya. “Mwaha wa xeeni ohononaka musurukhu anyu ni muthinto owo wa itthu?” Nnakhala vo, kuveerunu aamooroihani empa wo ottharuxiwa-wo, mwaha wa itoolare thanu mwa mipoosito nyuwo nveleelinhe-anyu mutthenkeso ohikhalihiwe oratteene wira waakheleke mipoosito, wira aroihiwe arummwa kamosakamosa ilapo s’okhopela. Ninoorowa okohiwa nihiku nlo, “Mwiirenle-ni yeeyo?”

⁴⁵ Hiyo na elapo y’eKristu, nave ipilyawu sinooveleeliheriwa atthu ale iwe, hiyo nimphavelaahu othuma opatthani aya. Vano awo anookhoota. Khivanxankiha Khrushchev ohimalyaawe wira, “Vakhala wira ookhala Muluku, Owo onoovela-tho empa Awe.” Apakawu anniwerya ohimya nuulumo nlo, wira

eniruuhele wuuliwa muru hiyo. Etthu xeeni yooniyemula! Ni hiyo niniisihana aKristu.

⁴⁶ Muluku iirale, “Murwe, muthume Ekumi Ehinimala, woohikhala musurukhu, woohikhala ehisapo.” Ekumi, wira nikhaleke mahiku othene, vano hiyo ninrukunuwela ettuli Yeeyo ni otheya wiitho Wawe. Ninrowa wira exeeni Nihiku nlo? Enrowa okhala exeeni. . . ?

⁴⁷ Vakhala wira Muluku onnivivaha itthu soowiira, ni onnivivaha musurukhu, ni onikhaliha elapo yooraalaxa vathi v'erimu, vano Muluku onoorowa onikoha, niirinhe-ni yeeyo. Xeeni hiyo ohononaka musurukhu ahu ni itthu sihintteeliha murima? Kahi wa elapo paahi, masi enoorowa okhala w'atthu; okhuma isentavo mpakha itoolare imilyawu, onivahiwa khula mmosa.

⁴⁸ Okathi atthu aniivanaaya mmosa ni mukhwaawe: kinoomalaru omusoma artiiku mmosa naanaano, vaavo amiravo anli ananvara muteko vapuwani va maxaaxa a wooyayani. Mmosa aarina aana athanu, mukina aya aarina aili. Nto mmosa aya aahaana ohiihiwa muteko. Nto mmosa w'aximiravo awo anli aarina aana aili, ahiiso aarina aana athanu, khoona wira owo aanitthunaxa muteko onvikana ole aarina aana aili; nto khurowa oxaya ni yoowo, vano khumoopela ottuli.

⁴⁹ Musurukhu, eyo p'inamuna y'elapo, owo ti moonelo, owo ti muthinto wa erooho enaaruma atthu.

⁵⁰ Vano munoowerya woona othuneyaxa xeeni Oyariwa vasya okhanlyaya. “Muhaana oyariwa vasya.” Ohaana okhala. “Murwe wa Miyo, ni muthume woohikhala musurukhu.”

⁵¹ Nyuwo muhiireke wira, “Miyo nkaarina musurukhu.” Khivantthuneya musurukhu. Enivahiwa mahala-ene.

⁵² Hiyo atthu a wAmerika noolamuleliwa oliva itthu sothene. Eyo t'ikano ahu. “Hiyo ninooliva itthu. Nihaana musurukhu.” Wooniha ittikitti sahu sa itoolare ilapo sikina, ni siiso, sikhanye soohaawa. Mweettaka, munoowoona maturista ophiya, othene oowara vooratta ni saana. Atthu a wAmerika animwaacalela. Etthu iyo ephwanyeryo yoonanara vamaithoni va Muluku. Eyo khenrowa othuma ephiro y'orowa Wirimu. Masi itthu sothene wAmerika, nihaana oliva sothene.

⁵³ Munoorowa orestaurante, munimoolya yoolya anyu ya ohiyu. Ni mwaahihele-ru musurukhu vameesa, ntoko esakwati ya namuteko owo, onthuka mannyaari wiitho, nuumala oliwiwa ni ekupaniya owo onvaraawe muteko. Ni eyo enreerela ekhaleke ipursento muloko mano, wala yoovikana, ya ekontha anyu. Mwaahiire, namuteko owo onimoowehani ntoko namilili wala ntoko enamuna emosa ya na—namuthoiwa. Nave, owo onnaakhela musurukhu awe. Kinoona wira iwo othakhaliwa ni yoowuuliha muru, wira yeeyo. Kinoona wira owo muupuwelo woonanara wa elapo. Khalayi, atthu ooreera murima, mapuro

ooreera, khiyaatthuniheryaka eyo. Masi yothene eyo enkela mwa erooho emosa yuulupale.

54 Miyo keetta mukwaha, mukampoyini. Nto namwaakhela maala. . . Kaahikhalana maala makhaani ntata nimosa, maala makina, ni ikaruma saka sikhaani so omettha saari vathi wa moonoo aka, nto kaamweetta. Namwaakhela maala khwaattama, khwira, “Kookuxeryeke-ni?”

55 Miyo khwira, “Oh, miyo kinrowa vale vakampoyini, mulopwana. Kooxukhuru, vanci-ene.” Ntoko paahi, oh, meeturu miloko miili ni thanu na piili.

56 Owo khwira, “Miyo kinookuxa,” vano owo khukuxa etthu yaamukhaani khuttukhula, khurowa eettaka.

57 Ahe, okathi orwiiyaawe, miyo kuupuwela wira khino miyo. . . Kaahisuwela wira aanilinvwa, masi wira kaarowa onvaha paahi e—onvaha etoolare nuusu. Owo alakela aakunxe, itthu saka, maana, niireke, ntoko minuutu mmosa; ntoko mpakha wookiseryani w’etapernakulu ila, vaavo owo aawenlyaawe mukampoyini. Miyo khuwela mukampoyini, toko, nto khookola moonoo khukuxa. Khunvaha etoolare nuusu.

Owo khwira, “Minuutu mmosa paahi!”

Miyo khwira, “Exeeni, mulopwana?”

Owo khwira, “Miyo kookuxenryeni mirupa miraru!”

Miyo khwira, “Ayo, mulopwana, eyo ekeekhaii. Exeeni, exeeni evonyeiyee?”

58 Owo khwira, “Olinvwa waka woomalela oyeva onkhala isentavo miloko miili ni thanu khula murupa. Sinnihala isentavo miloko miili ni thanu sikina.”

Moone, eyo ti ya wAmerika, itthu sothene sihaana olinvwa.

59 Munookhuma orowa weetakasa ni ekaaro anyu khumorela valittini, nto mwamphwanya mutthu wira okumihe. Vanreerela mwiilikanyihe wira mulive, okhala wira awo anoorowa woolokihani mwaha wa yeeyo. Ekuruwa yarwaaru wookumihani, owo onimoolivihani khata *khula* ekilomo. Nto vaakhanle wira mulimi, imaara thanu na xexe sa muloko, onookumiha etaratoore awe, enrowa okhala yootepa ovikana eyo.

60 Muhaana oliva sothene muniireliwaanyu. Itthu sothene ti “Oliva! Musurukhu! Oliva! Musurukhu!”

61 Nave nnakhala vo moota etampi yoorihenlaayani mulittini nuulupalex! Taani aarowa owerya wookumihani mulittini mwa etampi? Masi Muluku onnookumihani mulittini mwa etampi, woohikhala musurukhu, woohikhala ehisapo, okathi ahaakhanlyaawe hata mutthu aawerya wookumihani.

⁶² Nyuwo mwaahilive saana ekuruwa enookumihani, munookhala mulittini. Muhaana okhalana musurukhu ahiiso munihala mulittini.

⁶³ Masi nlitti nootepaxa mutonko anyu omorela-mo, ti nle xetwani oorihenlyaaweni-mo, nlitti na etampi ni ohaamini. Muluku vootthuna onimookumihani-mo, woohikhala musurukhu, voohiliva. Nave nnakhala vo nyuwo munihala mulittini, mwaaxamuryaka etampi, ni hata khamunimulompa Owo.

⁶⁴ Vaniphyaaya ekuruwa, voolimaleleya awo anihela ekwirinti yuulupale mulittini, anoosipheela vaparaxookeni ni siiso, khupacerya ovilikeiha. Nto ikuru sa ekaaro khunapcerya opurula, ni mutooro khunapacerya ovara muteko, ni opurulela ota.

⁶⁵ Okathi Muluku onoophwanyaaweni mulittini mwa etampi, ni owiiwani nyuwo munlompaka Yoowo, Owo onveleeliha ekwirinti yaasipheeliwe oKalvario, ophenta wa Muluku, ni onookweecerya vamurimani vanyu, ni onoohelela Owerya wa Erooho Yoowaarya vaavo, wira opacerye opurula. Ni khenlinvwa etthu. Nto nnakhala vo hiyo ninkhala mulittini okhala wira khaninwerya oliva ni ipoolosa sahu. Hiyo atthu a wAmerika ninuupuwela wira ninooowerya oliva sa mpoolosani mwahu, masi khamunwerya. Ti woohikhala musurukhu wala woohikhala ehisapo. Nyuwo khamunliva eyo okereja. Yesu ooliva oKalvario. Masi atthu anuuleliwa muru Yeeyo. Awo antthuna Eyo mwa enamuna aya. Muluku ohaana enamuna wira nyuwo mwaakhele Yeeyo, ni Eyo ti ya mahala nyuwo mwaakhela-ru Yeeyo.

⁶⁶ Voolimaleleya, awo yoopurulani-ru okhuma mulittini, munkhala othene oowarakhuwa, muhaana orowa, oxipiritaali. Ni awo ehinatthi opacerya woovarani muteko, ehinatthi wiiriwa etthu emosa, awo anookoha, “Taani onrowa oliva ekontha? Naarowaka vale ottottha makhwatta, naarowaka vale ottikitthela murette, ni woovahani ixasawu wira—wira noopopheni wira ehiononeye ephome, muthinto xeeni wa esekuuru murinaanyu?” Awo ehinatthi wira etthu emosa, ohaana okhala musurukhu ohoolo.

⁶⁷ Masi okathi Pwiy’ahu onihelaawe ekwirinti Awe ya mphento vamurimani vanyu, khookumihani mulittini mwa etampi, Owo onnivoniha khula murima wooriiwiwa, onookumiha itampi sothene. Nto ekontha eniheliwa mphareya mwa eliyalelo, wira ehupuweliwe-tho nthowa wa nyuwo. “Murwe, muhirina musurukhu wala woohikhala ehisapo.” Voohicala moota xeeni muriipiwaanyu murima, ni moota xeeni muukhunwe anyu, moota emusi anyu yiiralyaaya, wala etthu mwiiraly’anyu, khiivo hata ekontha wa yeeyo. Owo onnivoniha oriipiwa murima, onnikumiha mixankiho sanyu sothene. “Owo ohaaxeriwe sootheka sahu onyakatteliwe sootakhala sahu; ehukhumu

ennivaha murettele yoomulemela Yoowo; ni makhwatta Awe t'anivoninhe." Sothene ti sa mahala.

⁶⁸ Vano hiyo khaninaakhela Eyo, okhala wira ninweriwa ni erooho yootakhala. Hiyo ninweriwa ni erooho ya elapo, erooho ya molumwenkuni, ohiya oweriwa ni Erooho ya Muluku, Erooho Yoowaarya, enneetiherya ni ennihoola mwa Ikeekhai sothene, ni emmukhaliha Bibila eekeekhai.

⁶⁹ Okathi vakhani ovinre, miyo kaalavula ni mutthu mmosa oohaamini. Owo khwira, "Nkuupuwelani, Mwenye Branham. Otakhaliwa nno wothene wa makhalelo, ni etthu emosa paahi hiyo erinaahu, wira noopowe ti soolempwa kamosa-kamosa sa khalayi s'aYuta."

⁷⁰ "Oh," miyo khwira, "mulopwana, eyo pooti okhala yothene murinaanyu, masi miyo kookhalana etthu yoovikana yeeyo. Miyo kihaana Erooho ya Ole olempe Yeeyo, onlipiherya Yeeyo ni ommukhaliha ekeekhai, khula natiri." Owo khaasuwela moota wo okuxa eyo.

⁷¹ Moone, nyuwo muhaana orwa muthume muhirina musurukhu, othuma woohikhalana ehisapo. Khenlinvwa etthu. Ti ya mahala wa "ole ontthuna, arwe." Muluku onimookumihani mulittini.

⁷² Ntoko mulopwana vamukhora oniihaniwa Wooreera. Owo aakelihiwe mulittini, okhuma mmirimani mwa ame awe, ni xetwani aamurakalinhe inawu sawe. Enamuna awe yo okhala waari waavekela esimola atthu yaavira. Nto okilaanthe-ene vamukhora voosiisu ule, aahiwoona alaleyi anli apentekosite erwaasaka. Yahaarina hata esentavo, maana owo iirale, "Nkirina eparatha." Nto esentavo ti musurukhu wooyevaxa wa eparatha. "Eparatha ni eweero nkirina."

⁷³ Kinoona wira mulopwan'owo aahuupuwela etthu sa. "Khivantthuneya okhalana muhasa aka." Khino owo aaphavela osuka musurukhu oniphierya. Owo aarina miyaakha miloko mixexe, nto khino owo aathuna osuka musurukhu oniphierya, wira matothoro empakele attootto, wira eettaneke, maana, owo, mukosani mwawe aari ootteetheya. Nto khino owo aahaana okhalana musurukhu, wira olive voohooliha, matothoro ahinatthi onvaha mukhaliheryo. Nto vekeekhai khivaathuneya owo owookolela muhasa awe alaleyi ala apentekosite yahaarina etthu. Oweryaneya, awo...waari woohuupuweleleya, wo owerya ophwanya mwaawelo n'axilopwana ale.

⁷⁴ Masi okathi aawehalyaawe wiitho waya! Mmosa, mmiravo ni oosareya emiravo; mukina, muulweene ni oowuuluvala; okathi Yohani...okathi Petru ni Yohani awelanse aya vamukhora. Owo aahoona etthu mwa mulopwan'ole mmiravo. Wira, okhwila waari vaalupalexa vakhani ovikana voolimaleleya. Owo aahoona ovikana mannyaari ni ivelavelelo, sa nsuwa na oKalileya naapahale wiitho wa mulopwana namatotha ihopa,

waahikhala “ohakalala ohinlavuleya, ni woosareya ovuwa.” Owo aahoonna etthu yaakhala ntoko okhala yoovirikana vakhani.

⁷⁵ Moosuwela, yookhala etthu mwa oKristu, enaakhaliha atthu wooneya voovirikana. Awo atthu oomalela oreera mulaponi mothene.

Vano owo aahikuxa muhasa awe khookola.

⁷⁶ Nto murummwa Petru, oryeene muulupale, khwira, “Eparatha nnakhala eweero nkirina.” Mwa moolumo makina, “Nkinwerya wookhaliheryani, waathuma attootto ala. Eparatha ni eweero nkirina, masi ele erinaaka!” Owo aahirowa othuma wa Ole aarina oravo ni ohakalala wa eviinyu ya woopoliwa. Owo aammalaru orwa, mahiku maili wala mararu eyo ehinatthi, okhuma oPentekositeni, weiwo yaakhumelenlyaaya etthu.

⁷⁷ Vano mmiravo owo khutupha ni “amen” muulupale wa yeeyo, khunweha wiitho wawe.

⁷⁸ Exeeni yiiraneiyee? Ekwirinti iyo ya epatthanelo, omoriwa ikharari wa Ole iirale, “Miyo kihaamorela ikharari aretta,” Erooho emosaru yeeyo yaahikuxa opuro mmurimani mwa mutothi a ihopa mutokweene. Owo khwira, “Vanaasiwa musurukhu, miyo nkirina, masi kookhalana etthu enrowa okhala opuro aya imaara imilyawu sene. Yeeyo erinaaka!”

⁷⁹ Vano muupuwele, Petru aari muYuta, ni awo waasivelasa musurukhu, v’ephattu, masi muYuta ola aahirukunxiwa. Kahi, “Ele erinaaka, kinimootumiheryani.”

⁸⁰ Masi, “Ele erinaaka, kinimoovahani! Ele erinaaka! Miyo nkirina hata esentavo emosa mpoolosani mwaka. Nkaakhanle oowerya othuma ephawu ene. Nkaakhanle oowerya othuma hat’etthu. Miyo nkirina esentavo. Masi mwaaweryaka waakhela, ele erinaaka, miyo kinimoovahani okhala wira kiroovahiwa.” Ti yeeyo entthunaahu. “Ele erinaaka, miyo kinimoovahani.”

“Murina exeeni, mulopwana?”

⁸¹ “Miyo kaari osulu ni Yoole ontumiha eleethi ni oravo, woohikhala ehisapo. Kinimoovahani Yeeyo nyuwo. Nkinoolokihani etthu mwaha wa Yeeyo. Mwaaweryaka waakhela Yeeyo, miyo kinimoovahani. Kahi ntoko mutthu onliviha, masi ntoko ale anvaha.”

⁸² Okhala wira, “Siiso mwaakhenlaanyu mahala, nvaheke mahala.” Iwo waari oruma w’Apwiya awe, mahiku mararu paahi ehinatthi. “Murowe mulaponi mothene, mwalaleye Ehapari yooreera. Ole onrowa waamini khupatisiwa onimooopowa; nto ole ohinrowa waamini onoolamuliwa. Ithoonyeryo iya sinimwaatthara ale anrowa waamini: Mwa Nsina Naka awo anoowoomola axetwani; anoolavula ilavulelo isya; awo yawurya itthu siniva, khasinaatakhalihani; yavara inowa, khasinrowa waahaaxa. Siiso mwaakhenlaanyu mahala, nvaheke mahala.” muYuta ole aahirukunxiwa.

⁸³ Ethhu entthunaahu wAmerika orukunxiwa, wa Erooho Yoowaarya wira ekuxe opuro wa soowiira sahu sa etiini. “Siiso mwaakhenlaanyu mahala, nvaheke mahala.”

⁸⁴ “Yeeyo erinaaka, kinnoovahani: Mwa Nsina na Yesu Kristu a oNasareti, nvenye mweetteke”; waamini Nsina nlo noohihononiwa na Mpattuxa! Khivanxankiha owo vaaronwaawe otuphaka ni otuphatuphaka, ni omuttottopelaka Muluku!

⁸⁵ Oh, moosuwela itthu suulupale, owo khino aahikilaathi vale miyaakha miloko mixexe, aphaavelaka ophwanya musurukhu woophiyerya wira aathume attootto, masi khaawerya. Masi nipuro nootepa ohiweherereya, ni okathi woohiweherereya, ni atthu ootepa ohiweherereya, ni oohiphiyerya, owo aahiphwanya aatthunaawe. Kinnitthapa vanci-ene wira Muluku onniira eyo siiso.

⁸⁶ Mwa nikhuru nimoso naamukhaani, naahaniwa masantu oophirikeya ohiyu umosa, kaahiphwanya etthu kaatthunaaka, ele musurukhu wahaaweryaaya othuma. Munikhuruni n’atthu oohisuwela etthu, oohisoma, oohiwara oratta-ene, Anooripe, opacerya wene, iwe musaala yaamukhaani ya khalayi yoohivareliwa muteko, vathi, kaahiphwanya ehisapo, nniya; okathi mutokweene ole ooriipa aakiwenhe awe wiitho waka, khwira, “Muhaakhela Erooho Yoowaarya okhuma okathi mwaaminni anyu?” Oh, Eyo yaari etthu kaatthunaaka. Miyo nkaaweherereya ophwanya Eyo eriyari y’atthu ale, masi awo yaahikhalana ele kaatthunaaka.

⁸⁷ N.U. olelo, awo khayaarowa okupali ele erinaahu, masi ti yeeyo entthuneya wa awo. Khrushchev, othene aya akina, onnitthunaneya Kristu, moopatiisuni wa Erooho Yoowaarya. Enoorukunxa etthunelo aya. Enoowiiriha atthu, awo anaanyokhaaya, okhala axinna aya. Enookumiha ethaama aya, ni etakhalelo ni onyakulihana; ni ohela-mo ophenta ni ohakalala, ni murettele, oreera murima ni omoriwa ikharari.

⁸⁸ Ayo, mapuro oohiweherereya, imaara sikina nyuwo muniphwanyaanyu ele mumphavelaanyu.

⁸⁹ Exeeni aana a Isarayeli yaarowaaya ovaha (sothene saakhalyaaya wEjitu) okathi iyano saya saavuuvaaya ephome, okathi n lumi naya naakhumaaya mwaano mwaya? Awo yaanvaha eweero yotheene eyo yaawaakhalyaaya atthu a wEjitu, mwaha wa maasi ooreera ooriirya. Ahooleli aya a mothakoni yaahiweettiherya okhuma ntakwarikhwa ni ntakwarikhwa, okhuma malitti mpakha anaattuutu, masi sothene saari soowuuma.

⁹⁰ Vano khurwa, woohikhala musurukhu wala woohikhala ehisapo! Nsu khulavula ni profeta khwira, “Mulavule ni mwala,” etthu yootepaxa wuuma mothakoni, etthu yoorakamelaxa maasi. Vo ntthona naya naahimalihiwa, woohikhala musurukhu

wala woohikhalana ehisapo. “Mulavule ni mwala.” Kahi oliva mwala, masi “mulavule ni mwala.”

⁹¹ Owo nlelo ti Mwala ohiy’ula. Owo Mwala mulaponi moowuuma. Mweettaka mukwaha mulaponi mwenno moowuuma, mulavule ni Mwala. Khimurina omuliva owo; mulavule ni Yoowo. Ni Owo mukhaliheryo woowaakuveya okathi wo oriipiwa murima. Mwaawereiwaka, mulavule ni Mwala. Mwaawereiwaka etampi, mulavule ni Mwala. Mwakhala ookhulumuwa, mulavule ni Mwala.

⁹² Moone, yaakhala ntoko waarowa okhala nipuro . . . Yaakhala ntoko, vakhala wira khiyaakhanle maasi mapuro makhaani waari-mo anaattuutu, khiyaarowa okhala hata maasi vasulu vamwaako waattamela vamwala. Muluku onniira ithu voovirikana ni ele mutthu onuupuwelaawe. Mwala, nipuro noowuumaxa mothakoni, masi Owo khwira, “Mulavule ni Mwala.”

⁹³ Olelo, athu khanreere wootothiwa. Awo anuupuwela wira yaaweryakaru orowa ni wira mavekelo aya, omuliva namukuttho mmosa wira aavekelele vakhani, anooliva evirelo aya epantte ekina. Yatekaru ekereja yuulupale nipuro nlo, ni mutthu mmosa thaaciri onrowa okhaliherya, orowa ni okhala mwa ithaama, okhalana mutthu mukina wira aavekelele, owo onuupuwela wira ti yeeyo. Muluku khontthuna musurukhu anyu woonanara. Yothene Owo onthunaawe wiivaha wanyu ni makhalalo anyu wira silavule ni Yoowo. Muluku ohoovahani musurukhu, muhionone ni ithu sihinisiveliha. Murumeele ni ithu sinisiveliha. Masi oruha osiveliha w’ekeekhai, khimukhanle ophwanyaka mpakha mulavule ni Mwala.

⁹⁴ Owo aahiruuha maasi anvaha ekumi, woohikhala musurukhu wala ehisapo. Vano awo yaahiwurya, ni ikamelo saya saahiwurya, ni an’aya yaahiwurya, ni eyo nlelo ephattuwelo enikhwalala mothakoni.

⁹⁵ Ni ti siiso Owo ti Mwala olelo, muttethe ola woowuuma, wa athu anipweteya. “Othene ole oni omwaamini Yoowo khonipweteya, masi onookhalana Ekumi Ehinimala.”

⁹⁶ Nwehe. Khula ohiyu, awo khayaarina ovelavelaka mwaha wa yoolya. Mukatthe aya yaaniruheliwa awo, khula ohiyu, wa naanaano.

⁹⁷ Olelo hiyo ninoorowa okuxa mukatthe. Mwakhala mulipaoolola, vano khuneetta va olooca, ni wira, “Kaanitthuna mukatthe.”

⁹⁸ Owo aamwiira, “Mukoonihe, toko, mwaawelo anyu. Kintthuna isentavo miloko miili ni thanu mwaha wa mukatthe ola.”

⁹⁹ Nto munkhalana exeeni okathi munaakhelaanyu yeeyo? nihapuwaka mwa yeela vakhani, masi munkhalana ele yootepa

oyevaxa etriku empakaaya. Awo anookumiha e—evitamiina, ikalakathela sothene, khuvaha ekuluwe. Anootakanxa nikuttha na ekhattelo empharaana ni ikalakathela, khuveera, n'upaka nipattuuxa na mukatthe, yoopakiwa ni matata oottakatta, ooriipa, imaara sinci-ene. Munnoona etthu muniphwanyaanyu mmukattheni mwanu, imaara sikina, mikopwe sa maihi, ni itthu soohifayi, ni ikapatti sa makhule, ni sothene sikina simmorela mupatariiyani. Atthu anatampi arina iretta sa mukuwoni, ni itthu sothene, sootakanxiwa memmo. Monneru moota simpakiwaaya, hata khimwaarowa okhuura. Ni, nnakhala vo, nyuwo muniliva isentavo sanyu miloko miili ni thanu ahiiso nyuwo khimunaakhela.

¹⁰⁰ Vano Muluku aanaalyiha khula ohiyu, ni mukatthe woopakiwa ni matata a Malaikha; woohikhala musurukhu, woohikhala ehisapo. Nto, olelo, mukatthe ole waamuthoonerya Kristu, Ekumi ya muroohoni, okhurunwe okhuma Wirimu, wira ovahe Ekumi Awe.

¹⁰¹ Ni Muluku onnaavaha an'Awe, khula nihiku, musuwelelo wa naanaano. Muupuwele, awo yapweharu mukatthe ole, waamusukumana.

¹⁰² Mwamwiiwa mutthu alavulaka, "Ahe, kihaana... Kinimooleelani. Miyo ka Luteraano. Miyo ka muPrespiteriyaano, muPatista. Ka muPentekosite," nlo nipattuuxa na mukatthe wa khalayi woopakiwa ni ntata. Ti yeeyo tu ekhanle, woonanara paahi, ni woopakiwa ni matata a atthu.

¹⁰³ Masi mwaiwaru musuwelelo wa onamoona, wa naanaano, "Voosiis'ula, mmavekeloni, Erooho Yoowaarya yoopatisa munepa aka vasya," oh, munna, eyo Yoolya ya Malaikha. Owo onnaavaha yoolya ya naanaano, khula nihiku, enkhuma Wirimu.

Ipula sa iparakhha ninnitthuna;
Mattottoi a ikharari anninimorela,
Masi ninnivekela ipula.

¹⁰⁴ Oh, ayo, nveleelihe okhuma Wirimu, ya naanaano, Pwiya, Kristu Yolya y'Ekumi. Nveleeliherye Yeeyo mmurimani mwaka, ni mukitthuniherye kipuhe Mukhalelo Awe muulupale.

¹⁰⁵ Vekeekhai, awo yaahixukhuru. Awo yaahixukhurela. Ni khula mulopwana wala muthiyana oyariwe ni Erooho ya Muluku, ni onaakhela Erooho Yoowaarya, okathi wothene onookhala ooxukhuru. Voohicala exeeni enikhumelela, munookhala ooxukhuru.

¹⁰⁶ Ntoko mwammiravo, oohoona mmiyaakoni, Benny mwaamukhaani, vayariwaawe. Miyeeri soophiyaka mithanu na miraru, aana a mmaithoni khupacerya ottiyelela maitho awe. Axiitiithi awe yaari amasikhini. Awo yaakhalasa mukerekhere mwa ntumuxa na khalayi na marove. Ni awo yaanisuwelasa wira operasawu uwo waamuwerya woopola maitho a Benny,

wira owerye woona. Owo aari mmiravo vano a miyaakha soophiyaka muloko ni miili. Axitiithi awe yaawerya ophwanya paahi woophiyerya ephawu ni enama ya eyaakha. khiyaawerya oliva operasawu.

¹⁰⁷ Anamwaattamanani othene, vamosa, yaanimoono Benny ophavelaka othweela n'axinamwane iwe, oryeene ohoona. Owo khaawerya woona etthu aairaawe. Awo yaanimoonela othunku. Ni khula mmosa, mwaakha ole, yaahisuka nifunku naamukhaani na soohepha. Awo yaahivaraxa muteko vakhani okathi wa nswa. Nto vatumihiwaaya soohepha okathi w'ephovo, awo khukuxa musurukhu khimuhela mwaamukhaani Benny mukampoyini, khunveleeliha wa tothoro.

¹⁰⁸ Waahiiriwa operasawu oratteene. Nto vatthinke-awe, anamwaattamanani othene yaahithukumana erukurenrye-ene okathi Benny mwamukhani okhurunwaawe mukampoyini. Maitho awe makhaani, makumi yaamwaarya. Owo khupacerya okhuwela ni wunla, owehaka wiitho waya.

¹⁰⁹ Mmosa w'alipa ooweettiherya khwira, "Mwan'aka, operasawu anyu olinvwe kavi?"

¹¹⁰ Owo khwira, "Mwenye, nkisuwenle etthu alinve aya atthu ala. Masi kootteeliwa murima vanci-ene oweryaaka woona wiitho waya, ale alinve ehisapo."

¹¹¹ Eyo t'inamuna ninoonaahu. Miyo nkinsuwela etthu Yaathhuneiye wa Muluku. Miyo koosuwela wira Owo okivanhe yooreeraxa Owo aarinaawe, Mwan'Awe. Masi kinnixukhuru saana okhalana moonelo ola wa muroohoni, kinweryaaka oweha wiitho Wawe ni osuwela wira Owo ookikhwela. Miyo nkinsuwela etthu etthuneiye wa Yoowo. Hiyo khanrina hata enamuna y'othokelela ehisapo aya. Ehisapo yuulupale saana. Miyo nkaawerya wooleelani moota eryaaya. Masi miyo kinnixukhuru. Miyo kinnixukhuru, wira, nkoonaka, vano kinniweriya woona.

¹¹² Miyo kinnixukhuru wira okathi Axinna Mayo yaakileenle aya wira okathi aka waahiphiya, okathi matothoro yaakileenle aya wira nkaakhanle-tho okhalaka mukumi, miyaakha miloko miili ni mithanu sivinre, miyo ka mukumi olelo. Nkisuwenle etthu yaathhuneiye wa Muluku, masi kinnixukhuru wira ka mukumi.

¹¹³ Kaahinto okhala natampi, ootthukiwa mutampini, ni oriiipiwa murima, koovaka okhwa. Masi, olelo, okhwa ti oxintta waka. Aleluya! Eyo enookiroiha Ohoolo paahi wa Ole miyo onimpentaaka, wira kiwerye oweha wiitho Wawe. Owo oorukunxa etthu ene, ni operasawu, Owo ookuxa murima aka khupaka vasya. Koosuwela wira etthu yookikhumelela.

¹¹⁴ Vapapheloni va ihapari ephovo yookiserya, oMinnesota, aahikhala mwammiravo mmosa aamukunxe mucinka awe khurowa okereja voosiisu omosa, oxikola ya Ttiminku. Mmiravo mukina wa namwaattamanani, owo khaarina ocaliwa ni

exikola ya Ttiminku, owo aamukunxe mposi awe khurowa opatinari. Nto mulopwan'owo aari mulweene, vano owo khukela muxeeluni yoopepheya khumora. Owo aahimutheya mwanamwane voosiis'ule okathi waarowaawe mphironi, khimuleela mposi awe, khwira, "Nle nikhuru n'anamathipelela ninrowa ekerejele." Nto okathi owo opwinne awe muxeeluni, mposi awe aari ottaiwene wa yoowo. Owo aari ooveyaveya; khuwerya okhuma. Masi vakhumalyaawe aahihela miyoono sawe muxeeluni, owo khuhameela, khupharelela muxeeluni.

¹¹⁵ Mposi awe khuphavela omookolela ntata, masi aari oorilela, aampwexa exeelo. Owo khimukhuwelela, "Mutthike! Mutthike! Nyuwo munoomora paahi, nto hiyo oowaili ninoosama." Owo aahikhuwela, khunla, ni khiyaakhanle etthu wira emukhaliherye.

¹¹⁶ Nuuvira okathi vakhani, vasulu va ntumuxa, aahirwa mucinka mwaamukhaani, onyokoliwaka, mwammiravo mmosa ni Bibilia vathi va moonoo awe. Owo khwiiwa onyakula, vano owo khumuupiha mucinka mwaamukhaani. Khumpweha Bibilia awe vathi, khukhuma atthimakaka muxeeluni. Kwiipurula n'irukulu awe yaamukhaani, ni ikuwo sawe sooreera, mpakha ovara miyoono sa mulopwan'owo, khukhala ampurulelaka ottuli, mpakha omukumiha muxeeluni. Khutthimaka khweemexa ekaaro. Khwiitthaniwa ampulansiya khurohiwa oxipiritaali.

¹¹⁷ Varonwaawe khimuliva ampulansiya, khwaaliva matothoro ixasawu sa eretta ya masasu ni itthu aakuxalyaawe, owo khimurweela mwammiravo. Owo khwira, "Mwan'aka, kooliveni kavi?"

Owo khwira, "Hat'etthu."

¹¹⁸ Owo khwira, "Munnikilokiha ekumi aka." Nkuupuwelani yeeyo. Musurukhu khuwaawerya oliva. Yaari ekumi awe.

¹¹⁹ Eyo p'inamuna vantthuneya hiyo woota wa Muluku. Kahi othuma evirelo ahu n'itthu; masi hiyo ninnilokihiwa ekumi ahu wa Muluku, maana hiyo naamookhwa ni naamusama mulittini mwa etampi. Muluku khukipatikha ni miyoono Sawe ni nlaya.

Miyo kaamusama vathi mutampini,
 Ottaiwene wa opatari wa muretele,
 Oowaatta malepa vathi muhina,
 Kisamaka voohikhuma-tho;
 Masi Mwiixuttihi a mphareya
 Khwiiwa wunla waka woohirromela,
 Khukikumiha mmaasini,
 Vano kiri owoopowa.

¹²⁰ Owo onnikilokiha ekumi aka. Owo onnoolokihani ekumi anyu. Owo onnoolokihani ekumi anyu, wira mmurumele Yoowo; kahi wira nvahererye, weetta ni wiittottopana muromolelo wa ekereja anyu; kahi orowa nwuulumelaka akina; masi ophavela

waarumeela ni owoopola akina, ni waaruuha omusuwela Pwiya Yesu Kristu.

¹²¹ Mwaana namahonona. Kimalihaka, miyo kinoowerya ohimya ela. Okathi waahononne awe soolya sawe sothene, soolya s'atiithi, ni makhalelo oohiisumaaliha, nto okathi waatthikelaawe owaani...Owo aammaathiki munikhomani mwa ikuluwe, vano khwiisuupuwela. Nto owo khwira, "Anamuteko akavi oolempwa, atithi aka arinaaya, hata anihala, nto va miyo kinookhwa, mwaha wo othoiwa." Ankhi owo eerenrye-ru ohimya wira, "Kinniikoha kaarine-ene musurukhu kikhanyaaka waaliva atithi aka (ole kihononne aka kikhumaka) ni yoowo?" Masi owo aanisuwela mukhalelo w'atithi awe, nto owo iirale, "Miyo kinoovenya kirowe w'atithi aka."

¹²² Atithi awe khanahimyeke wira, "Nwehererye minuutu mmosa, mwan'aka! Munttikiha musurukhu aka?" Nnari. Awo khiyaamuhimyanne itampi sawe. Awo yaahitteeliwa murima mwaha wa owo otthika. Awo yaahitteeliwa murima mwaha wa owo wiisuupuwela, okhala wira owo aari mwan'aya. Owo aari mwan'aya. Awo yaahitteeliwa murima okhala wira aarowa owaani. Vano, awo khiyaakhalihenrye etampi awe, masi yaahitteeliwa murima okathi aaisuupuwenlyaawe khwira, "Miyo koomutthekela Muluku aka, ni atithi aka. Miyo kinoovenya kirowe wa yaawo."

¹²³ Nto vamoonalayaaya, ottaiwene, yaahimutthimakela khumpecari. Nto awo khwira, "Aiviwe mwaanyompe ooneneva," woohikhala musurukhu. "Eruuhiwe ekuwo yootepa oreera," woohikhala musurukhu. "Eruuhiwe epeethe," woohikhala musurukhu, "eheliwe mukathani mwawe. Nrowe nilye, niwurye, ni nihakalale, okhala wira mwan'ka ola aahirimeela nto vano oophwanyaneya. Owo aahikhwa, vano okhala-tho mukumi. Nrowe nitteeliwe murima mwaha wa yeeyo."

¹²⁴ Mukihiye kihimye ela, apatthani, wira kimalihe. Etthu emosa paahi ensiveliha, itthu s'ekeekhai paahi sikhhanle, itthu sooreera paahi sikhhanle, khasinweryaneya othummwa ni musurukhu. Iyo ti soovaha sa mahala sa Muluku, mwa Yesu Kristu: woopowa wa munepa; ohakalala. Murwe mulye, ni nvone.

Munihononela-ni musurukhu ni itthu sihikhanle yoolya? ni muteko anyu ni itthu sihinvoniwa? mukiwiriyanee vanci-ene, mulyeeke. . . ele eri yooreera, munepa anyu opuheke itthu soonuna.

Muuramihe maaru anyu, murwe wa miyo: mwiiwe, nto munep'anyu onookhala mukumi; ni Miyo kinoopaka mwaataano ohinimala ni nyuwo, hata vekeekhai omoriwa ikharari voolipihereya wa Davidi.

¹²⁵ Itthu sothene sinlekela, itthu sothene siri sooreera, itthu sothene sikhhanle soopuheya, itthu sothene sikhhanle Soohimala,

ti sa mahala, ni khasinlinvwa etthu. Ni wookiseryani wa elepeliwo ya Eliivuru ila, ehimnye wira, “Ole ontthuna, arwe awurye Maasi a ephattuvelo y’Ekumi, mahala,” woohikhala musurukhu, woohikhala ehisapo. Munihononela-ni musurukhu anyu ni itthu sihinvonniwa, ni ohiya itthu s’eekkehai sinvonniwa, mahala, munarowa voochikasooa mmansinyu?

Nivekele.

¹²⁶ Muryeene oomaala ni nvekelaka, aakhala, mpaani mu, voosiisu ula, ale ahiwunrye v’Ephattuveloni vo, ale sootthuna sa molumwenkuni nlelo siri mmakhaleloni mwanyu, ni mwaatthuna waakakhanya nipuro nanyu n’owurya, voosiisu ula, wala waakhiwa musurukhu anyu? Mwaamutthuna orwa ni othuma wa Muluku, (woohikhala musurukhu, woohikhala ehisapo), oravo ni eleethi, ohakalala wa eviinyu? Mwaamuvexa ntata, mwiire, “Mukuupuwele, Munna Branham, mwaavekelaka”? Muluku ooreeriheni, mulopwana. Muluku ooreeriheni, mulopwana. Muluku ooreeriheni, murokor’aka. Aakhala akina yaarowa wira, “Mukuupuwele, Munna Branham, mwaavekelaka”?

¹²⁷ Akina wa nyuwo amwaavano, ayo, muhononne soolya sanyu. I—i—iwoora amaama avirinhe aya yoovekelelakani nyuwo, ni apaapa, wiixuttiha wothene mwiireliwaanyu, nnakhala vo nyuwo murookakha, wira mwiivelele waapa wa xetwani. Vano nyuwo muntthuna muusika wa molumwenkuni, itthu sa molumwenkuni. Vano muhiisuupuwele, ntoko namahonona munikhomani mwa ikuluwe. Mwaamutthuna ovenxa ntata, munna muthiyana, mulopwana, ni wira, “Muluku, mukuupuwele. Wira kiisuupuwele, voosiis’ula, mukitthuniherye kirwe owannyaya Atithi”? Khenitthuneya hat’etthu wa nyuwo. Owo onoowehereryani nyuwo. Hata wira mwinre-ni, “Hata itampi sanyu sikhhalaka sooxeerya, sinookhala soottelea ntoko nakhutu; soophilivila ntoko ekarmesim, sinookhala soottelea ntoko manri.” Ari mwa Mukhalelo wa Muluku, ale yaarowa ovenxa ntata?

¹²⁸ Ale anwereiwa ni oothoiwa, aniira, “Miyu—miyo koomorela mulittini. Satana oo—ookiirela yootakhala. Owo ookirakaliha ni ookikhaliha mureta, wala etthu. Kintthuna, voosiis’ula, wira ekwirinti ya waamini wa Muluku ekele mmurimani mwaka, enrowa okikumihla mulittini mu, ntoko mulopwana vamukhora onihaniwa Wooreera.” Nvenxe matata. Muluku ooreeriheni, khula mmosa.

¹²⁹ Pwiya, miyo kinaaruha wa Nyuwo, okathi ula, ale avenxale mata’aya, wira eleveleliwe itampi saya. Nyuwo mwa Muluku, ni Muluku mmosa. Vaavo vo awo akilaanthe-aya naanaano va, ti vaavo Nyuwo mulavunlyaanyu ni yaawo. Ti vaavo Nyuwo mwaakupalinhe anyu wira awo yaahivonya, okathi Masu aphwannye aya opuro Aya, ni Erooho Yoowaarya khupacerya

olavula, ni wira, “Moovonya. Murukunuwe, murwe-tho wa Muluku Tithi.” Vano awo khuvexa matata aya, wira yooniherye wira yaatthuna okhuma munikhomani mu na ikuluwe na elapo ya vathi, wira erwe owannyaya Atithi, weiwo siri-wo soowaatta, weiwo ahirinaaya oruuha etthu. Ntoko mulipa-oolepa ohimalyaawe oratta-ene, “Hat’etthu mmatatani mwaka nkiniruuha, kinvarelela vamwiikimanyoni Vanyu paahi.” Wira awo erwe, vooaaleleya, voowiiyeviha, ni ekupalihwe, ni evahererye makhalelo aya. Nto Nyuwo munookumiha nlaya nooreerela; ni epeetthe, muhele mukathani mwaya; ni mwaalyihe ni Emana ya Mwaapwittipwitthi oowiiwiwa. Munivahe, Pwiya.

¹³⁰ Aakhala ale anwereiwa ni ooriiwiwa murima. Awo aathoiwa. Satana ohaarihela mulittini, tthiri, mwaha wo ohikhalana musurukhu wa operasawu. Vekeekhai, khino, anci-ene aya khayaawerya wooperariwa. Khino meetiku khaawerya okumiha-vo mwaha ene, hata wira jaarina musurukhu munci-ene. Masi Nyuwo mwa Muluku. Ni kinvekela wira okathi ene yoola, vathi va muttikitthelo wa Erooho Yoowaarya eri vaava naanaano va, wira Nyuwo munvonihe khula mmosa a yaawo. Awo epenuwe, okhuma mmuruni mwaya mpakha munawoni, khula etthu.

¹³¹ Yakhala ahirina ohakalala; woopoliwa waya, khakhanle opuhaka-tho. Ntoko Davidi sihimalyaawe, a khalayi, “Mukivahe-tho ohakalala wo woopoliwa waka.” Awo yaakhele ohakalala ni otteeliwa murima, mwaha wa oxanka waya ni okhulumuwa, maana Nyuwo mwa Mwala mutthayani moowuuma. Nyuwo mwa ntthyawelo okathi wa mwanankhaya. Okathi xetwani onaarihelelaawe khula eretta ni musika, Nyuwo mwa ntthyawelo okathi wa mwanankhaya. Ekhahelele siiso, olelo, Muluku, maana hiyo ninvekela mwa Nsina na Yesu. Amen.

Voowiiyeviha ni vooreera murima Yesu
 onniitthana,
 Oniwiitthanani nyuwo, miyo,
 Hata nikhalka oottheka, Owo ookhalana
 omoriwa ikharari ni nlevelelo,
 Woolevelelani nyuwo ni miyo.
 Murwe owaani . . .

¹³² Vano, mwatthuna vale, murwe waltaari mukokhore, hiyo pooti ovekela ni nyuwo, woottikitthelani, etthu p’itthu naakhanlyaaahu wiiraka. Nyuwo mwa oorwa saana.

. . . oowooceya, murwe owaani;
 Vanci-ene, vooreera, Yesu onniitthana,
 Onniitthana, O natampi, murwe owaani!

¹³³ Munnimpheenta Yoowo? Teddy, mwaamuwerya onivaha erumihelo, “Kinnimpheenta Owo, kinnimpheenta Owo okhala wira Owo t’opacenyre okiphenta.” Mwaamuwerya orumiha yeeyo?

¹³⁴ Nrowe niipe wa ovuwa Wawe, nihinatthi orukunxa eyeettelo ya muteko, okathi vakhani paahi. Nno okokhorela. Mutthaka wookhuma. Kinnitthapa mwaha wa nyuwo waakhela Yoowo. Kinvekela wira wooreereleni etthu, okhala wira miyo wookireerela olavula Yoowo. Miyo kinvekela wira muupuxeryo ene yoowo kivahiwe aka, wira koolaleeryeni Yoola, nyuwo mwaakhele Ola ni muupuxeryo mmosaru Owo ovelelihaniwaaya. Apwiya ereerihe yoola wa murima anyu. Vaareera.

Miyo kinnimpheenta Owo,

Vano mphunye maitho anyu, naaipaka. Nvenxe matata.

. . . Miyo kinnimpheenta Owo
Okhala wira Owo topacenrye okiphenta miyo
Ni oothuma woopowa waka
Vamwirini w'oKalvario.

¹³⁵ Vano nrowe nuuramihe muru, niipaka muhina. Munnimpheenta Yoowo? Owo kahi eekeekhai mmurimani mwanyu? Khekhanle etthu ya Yoowo, eyo eekeekhai tu? Miyo kinnimpheenta Owo okhala wira Owo t'opacenrye okiphenta, ooriha eliinya ya Ekumi okhuma oKalvario, khutthukela Yeeyo mmurimani mwaka.

¹³⁶ Muhilyale, Munna Drummond onrowa onilaleerya ohiy'ula, ohiyu wa ekomunyawu. Mwaaphentaka Apwiya, murwe mwaakhele ekomunyawu ni hiyo. Apwiya yatthuna vale, kinookhala vaava ni nyuwo. Owo ti mutthepa a Munna Tony Zabel; Munna Thom a wAfrika; mwan'awe, mmiravo ooreera murima; muKristu saana, oolipa, mulaleyi mwaamukhaani ooreerela.

Okhala wira Owo t'opacenrye okiphenta miyo
Ni oothuma woopowa waka
Vamwirini w'oKalvario.

¹³⁷ Nuuramme-ene muru vano, epiyaano etthikelaka.

¹³⁸ Pwiya Yesu, hiyo nihanle okelela muteko mukina, Pwiya. Hiyo ninnooxukhuruni Nyuwo mwaha wa Erooho Yoowaarya elavunle ni mirima sahu. Ni hiyo ninnitthapa, Pwiya, wira Nyuwo muhiira yeela mwaha wa hiyo. Ni wira Masu Anyu ahithikele wa Nyuwo siyo-ene, masi Awo avare ele anthuneyaaya wira avare. Awo ekhale mmurimani mwahu sothene, wira nisuwele wira itthu sothene s'eekeekhai ni sinlekela sinkhuma wa Muluku, woohikhala musurukhu, woohikhala ehisapo. Xeeni nto owanelaka itthu, ni okhaliha mwaha wa ekumi ni okhwa, itthu sinrowa opweteya? Munihiye niwanelaxe, Pwiya, itthu sihinrowa opweteya, sihirina ehisapo. Ehisapo yoolinwva mahala, ni wookhala olattuliwa orwa, "Ole onttuna , arwe."

¹³⁹ Mureerihe epante yookiserya ya muteko ola. Munivahe, Pwiya. Ni mukumane ni hiyo ohiy'ula. Mureerihe muteko w'opatiiso. Okhale omwaraxiwa wuulupale. Wira atthu ala, anrowa opatisiwa mwa Nsina na Mwan'Inyu onimphentaxaanyu, Pwiya Yesu, ekhale oosareya Erooho Yoowaarya. Wira atthu ala, avenxale matata aya, wira attharuwe, voosiis'ula, itampi saya, awo arwe, aware ikuwo sa opatiiso, ni evolowe mutankini, ni yooniherye olumwenku wira aaleveleliwa itampi saya. Ni wira ampatisiwa, wira efuciwe muliivuruni. Munivahe, Pwiya.

¹⁴⁰ Mukhale ni Munna Drummomd ohiy'ula okathi owo onniruuhelaawe mutthaka, musya okhuma Veehiceni. Mmuttikitthele ni Erooho Yoowaarya. Ni mukhale ni hiyo okathi onaakhelaahu ekomunyawu. Mirima sahu sikhale sooreerela ni sooloka, ohikhale hata onanara mwa hiyo. Ephome ya Yesu enirapihe itampi sothene. Munivahe, Pwiya. Mukumihe eretta eriyari ahu, ni munivahe ohakalala ni murettele. Mwa Yesu Kristu hiyo ninnivekela. Amen.

miyo kinnimphenta . . .

¹⁴¹ Munnimphenta Yoowo? Vano nvenxe matata.

Miyo kinnimphenta Owo

Okhala wira . . .

Vano mookole moonoo nvahane matata ni mutthu ori vakhiviru ni nyuwo.

. . . toko . . . (Russell, miyo kinnimphenta Owo.

Kakhwa olelo, kinnimphenta Yoowo.)

Nto oothuma . . .

Ti yeeyo, mookole moonoo murukunuwe nvahane matata.

. . . woopowa

oKalvario . . .

Vaareera, Munna Neville, ni nuulumo nawe. Vaareera.



WOOHIKHALA MUSURUKHU WALA WOOHIKHALA EHISAPO EMK59-0802
(Without Money Or Without Price)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yeettaka 2 mweeri wa Agosto, 1959, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org